



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma :

f Tir Yimiyim

tiryimiyim@aolima

tir yimiyim

TAPAK 8

T20 WC sülen Ravi Shastri-
head coach mapa toktsütsü

VP Kamala Harris tepsettsü
amokmerenba atema tetsür ka aitsü



VOL. XVIII NO. 334 (ADOK 334) DIMAPUR

YANGTEPNÜ (THURSDAY)

RONGJUI (SEPTEMBER) 16, 2021 ₹ 5.00

Nagaland nung UNLOCK 6 atema tetuyubatem agütsür Class 5 nungi 10 tashi school 50% lapoktsü melar

Dimapur, September 15, 2021 (TYO): Nagaland nung COVID-19 atema High Powered Committee (HPC) senden ka amending UNLOCK 6 atema teletetba kar agiogo.

Chief Minister menden ser HPC senden nung September 17 nungi September 30, 2021 tashi talenba kar salar lockdown tenokdangbatem alitsü lemtet, ta tanü Home Department sangdong ka nung ashi.

Iba mapang sorkar office ajak nung COVID-19 inyakyim sülen anidaka 100 % attendance alitsü.

Ano, yimtsüngtem nung Class 5 nungi Class 10 tashi kaketshirtem 50% attendance lia school tem lapoktsü melar. Ajisüaka, school temi Home Department-i latettsüba SOP sülen anidaksü.

Külen, jilattem nung October 1, 2021 nungi Class 5 nungi Class 10 tashi school lapoktsü melar saka 50% attendance dang asütsü. School temi Home Department-i latettsüba SOP sülen anidaksü.

UNLOCK 6 mapang aonung curfew ghonda ka salatsür aser aonung 9:00 ako nungi anepdang 4:00 ako tashi curfew alitsü.

District Task Force (DTF) temi pei pei telongtet nung dokan aser shishilembadak lapoktsü atema teletetba agi.

Iba mapang swimming pools aser cinemas nung 50% capacity lia lapoktsü melar aser iba atema Home department-i SOP agütsütsü.

July-December 2021 session atema Polytechnics nung offline class tenzüksü melar aser iba asoshi college aser technical institutions atema SOP latettsüba sülen anidaksü.

HPC senden nungsa Hornbill Festival atema jembidang Nagaland nung positivity rate 5% teküpok süra Hornbill Festival amongtsü ta sorkari lemtet. Ajisüaka, COVID-19 inyakyim sülen anidaka benjung amongtsü. Vaccine agirtem atema Nagaland nung tourism lapoktsüogio anungji tourist temi hotels aser tanga facilities nung pre-booking tenzüksü akok, ta HPC-isa lemtet.

Hornbill festival dak sendakba nung September 23, 2021 nü Department of Tourism aser Department of Art & Culture den inter-departmental senden ka amentsü.

Tanü Dmr aser Mkg nung shishilembadak ajak shibangtsü

Dimapur/Mokokchung, September 15, 2021 (TYO): Dimapur Chamber of Commerce & Industry (DCCI)-i September 16, 2021 nü Dimapur nung dokan aser shishilembadak ajak shibangtsü.

Iba ya Confederation of Nagaland Chamber of Commerce & Industry (CNCCI)-i state ajungalen shishilembadak shibangtsü ayongzükba sülen anidaka agütsü, ta DCCI-i Bodbarnü metetdaksü.

Ghonda 12 mokdangbaji anepdang 6:00 ako nungi nikongdang 6:00 ako tashi alitsü.

DCCI-i mokdang ayongba ya dokan, shishilembadak aser goods transport atema dang lir aser iba ajanga sorkar office tem, bank mestüra shisaliok rejutem nung mekongshir. Maneni, goods transport dak alaka sorkar mesüra nija garitem senzüba menokdang, ta President Akashe Zhimomi-i sangdong nung metetdaksüogio.

CNCCI aser district unit aser ano civil society aser tanga teloktemi ozüing alema tax saruba anema noktakba nung yaritepba atema kanga pelar, ta DCCI-isa ashi.

State sorkari shishilembatem indang khuret kar atema telangzüba agütsüogio saka CNCCI-i ashiba ama state sorkari onük kar atema telangzüba tejangja magütsü lir, ta DCCI-isa

metetdaksü.

September 16 nü tiptema dang mokdang amongtsü aser tongtipang tesemtem aser gate nung volunteers mapa lemezüka anütsü, ta DCCI-isa ashi.

MOKOKCHUNG: Dimapur Chamber of Commerce & Industry den amalitepa telungjem sayütsü aser Confederation of Nagaland Chamber of Commerce & Industry (CNCCI) nungita Mokokchung Chamber of Commerce & Industry-ia Sept 16, 2021 nü anepdang 6:00 ako nungi nikong 6:00 ako tashi Mokokchung town nung dokan-tem aser business dak sentakba maparen kecha meinyaki shibangtsü, ta MCCI tir aser tongti zülür - Tsükti Longkumer aser Limalenden Longkumer nati metetdaksüogio.

Anogo ka dokan aser business establishment ajak shibangbaji talisa state sorkar dang business inyakertemi timtem ajuruba rongnung item mepelaba sayütsü asoshi lir; Naga political group-temi saru onsara meshiba, civic bodies aser government agencies-temi GST kübok aitba osettem nung tax/fee meshiba, state sorkari SARFAESI Act mapa mekümtetba aser municipal, town aser ad-hoc town council-tem nung business community nungia nominee atema akangba item kuli ajanga iba mera ya agir, ta MCCI-isa metetdaksü.

Nagaland-i R.N Ravi nem tetushi agüja yokogo



September 15, 2021 nü Dimapur Airport nung Nagaland Ministers, Advisors, MLAs, sorkar ketdangsurtem aser temeimertemi Governor RN Ravi nem tetushi agüja senshidang agiba noksa angur.

Dimapur, September 15, 2021 (TYO): September 15, 2021 nü Nagaland sorkari Dimapur Airport nung taoba Governor aser Naga peace talks interlocutor RN Ravi nem tetushi agüja pa apusoa yokogo.

Iba mapang Minister Pangynu Phom, Minister Tongpang Ozukum, Advisor Zhaleo Rio, Advisor Tovihoto Ayemi, MLADr. Chotisu Sazo, MLA Azheto Zhimomi, Commissioner Nagaland, Rovilatuo Mor, Deputy Commissioner Dimapur Rajesh Soundararajan IAS, Commissioner Police Dimapur Rothihu Tetseo IPS, ADGP (Admin) Renchamo P. Kikon, IPS, DIG, Training Center Dimapur, Aotemsu aser sorkar ketdangsurtem den GBs aser village council züngsemtem liasi.

Tanü nikongdang 1:50 ako meta R.N Ravi Dimapur Airport tonga arudang 9 Nagaland Armed Police IT Battalion, Saijung-i pa nem Guard of Honour agütsü.

"Nagaland indang tarütsü lanur ket nung lir" - R.N Ravi

Tamil Nadu nung Governor inyaksü atema apusoa maodang Ravi-i Nagaland nung lanurtem dang ashikülakba aser ozüing alema inyakba melena ochi aser yimjung nung amettsü ayongzük.

"Nagaland indang tarütsü nenok ket nung lir. Anungji yimlibilema nenoki mangdang ayuba ama Nagaland yangertsü merangang" ta Ravi-i metetdaksü.

Nagaland nung alirtem aser yimjung aginürtem den külemi inyaksemtsü maongka anguba atema pelar. Nagaland nung alirtemi

maneni yimjung aser azükaru atema noktaksü amanger ta paisa ashi.

"Küm ana ser tera nenok den Governor ka ama inyakdang ni tali ajemalushiogio. Nenoki ni medemer ka ama temeim aser keta asenba atema kanga pelar. Nenok dak yimya tajung, tongmelang shisatsü, ochi atema aremzüka ataba ajanga ni ainer ka ama masü saka külem nisung ka ama lia aruogo" ta Ravi-i metetdaksü.

"Nenok atema ni teti sarasademtsütsü aser Tsüngrem taochi nenok madak teti liangma" ta paisa ashi.

Mongulbar aonung State Banquet Hall nung RN Ravi nem State Farewell sentong ka ayonga agi.

"Nagaland ya Tamil Nadu den kecha tepila mali. Industry tsütsü tangar memenepba dak alaka meimchir libaliro aser tangatetba nungbo tangar den kasa dang lir" ta Ravi-i iba sentong nung jembidang ashi.

Interlocutor ka ama pai bendanglen olemtepba nungi pei lima aser nübor alidak olemteptsü bener arutsü merang ta paisa metetdaksü.

"July 1947 nung Naga lennir kar Mahatma Gandhi den ajurutepdang Gandhi-i parnok dang pa ama tashiyim agi masü saka timi yimten nükjidong atongtsü atema inyaksü ashi. Naga national movement maparen timi inyak tashi Naga nung longjema liasü saka ozüing alema inyaksü tenzüka ajanga Naga nung lemsa aser teblemtsü talila bener aru" ta Ravi-isa ashi.

"Ravi ya tila akümba nisung ka

lir. Pai tenüing agütsü teblemba kecha melii dang pa nem lemezüksüba mapatem inyakogio" ta Nagaland chief minister Neiphiu Rio-ia ashi.

"Pa ya kanga dang tenendak aser bendanga agüja inyakba ketdangsur ka lir aser pai tetsübu kecha melii shitak ta angatetba mapa inyaker. Mapa inyaksü mesademaka pai pa tajung aika inyaksüba atema kanga pelar" ta Rio-isa ashi.

Ravi-i Naga nung aser putiotsü den taginüba jungjunga meteta lir. Pai Nagaland nung inyakdang tayongzükba aika ajuruogo aser mapa aika ano metembang lir" ta paisa shisem.

"Ravi-i Naga yimjung olemtep atema interlocutor inyakdang August 3, 2015 nü NSCN (IM) den Framework Agreement nung sign asü. Iba sülen November 17, 2017 nü Naga national political groups den Agreed Position nunga sign asü. Iba ajanga pai meranga inyakba aser tiyongtsü nung ia jembishinü sütetba kulitem agütsür" ta Rio-isa metetdaksü.

Ravi-i Nagaland renloksü aser ajungtsü atema süiki ia bilema inyak aser state ket nung aliba rongsen tera ajanga akokba tashi infrastructure aser welfare mapatongtem inyakogio. Paisa Nagaland nung Covid-19 teblemtsü azüoktsü atema kanga yaritepogio, ta paisa ashi.

"Nagaland nung alirtemi Governor Ravi-i Governor ka aser ano interlocutor ka ama akokba tashi inyakogio ta zülüoka ayutsü" ta Chief Minister Rio-isa metetdaksü.

Iba sentong nung mendenji Nagaland Chief Secretary, J. Alam, IAS liasü, Pastor, Shan Kikon-i temoatsü meshia sarasadem aser TaFMA-i sobaliba shilem ka agi.

Ravindra Narayan Ravi ya 1976 batch (Kerala Cadre) Indian Police Service ketdangsur ka lir. Pai Indian Police Service nung takok ngua inyaker 2012 nung Intelligence Bureau indang Special Director ama inyakalia mapa nungi sodi angu. 2014 nungi Ravi-i Naga yimjung olemtep atema Interlocutor inyakba aru aser August 1, 2019 nü Nagaland Governor inyaksü tenzüka liasü.

India President Ram Nath Kovind-i pa Tamil Nadu nung Governor inyaksü shim.

COVID-19 Nagaland: 88 taneptsü angu & 37 dak putet

Kohima, September 15, 2021 (TYO): Nagaland nung tanü agi anogo tenetbuba COVID-19 putetertem dang nungibo taneptsü angur teimba liasü. Bodbarnü nisungh 88 taneptsü angu aser 37 dak putet.

"Tesüiba ghonda 24 tsüngda nisung 37 dak COVID-19 aliba putet. Parnokji Dimapur nung 17, Kohima, Mokokchung o Tuensang nung pungugu (5), Peren nung 2 aser Kiphire, Longleng o Zunheboto nung kaka (1) lir" ta Integrated Disease Surveillance Project atema State Nodal Officer,

Dr Nyanthung Kikon-i ashi.

"Kasa mapang COVID-19 puteta alir nisung 88 taneptsü angu. Parnokji Dimapur nung 54, Kohima o Mon nung terer (10), Phek o Zunheboto nung pezüzü (4), Mokokchung o Peren nung anana (2) aser Tuensang o Wokha nung kaka (1) lir" ta paisa ashi.

Nagaland nung nisung 30,731 dak putetba nungi 28,626 taneptsü nguogo aser ibaji 93.15% lir. Tang nisung 519 anepaludar, ta Dr Kikon-isa ashi.

"Mongulbar tashi nung nisung 673,389 nem COVID-19 vaccine

indang dose 945,924 agütsüogio" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,907, healthcare workers 15,993, arishi küm 45 ser temapur 195,698 aser arishi küm 18 nungi 44 tsüngda alir 400,791 lir, ta paisa ashi.

"Vaccine agirtem rongnung nisung 272,535-i dose anaprong agiogo. Parnokji frontline workers 46,115, healthcare workers 13,077, arishi küm 45 ser temapur 123,733 aser arishi küm 18 nungi 44 tsüngda alir 89,610 lir" ta Dr Thurr-isa metetdaksü.

Kohima DPDB senden nung Society tenet registration atema jembia



September 15, 2021 nü DC Conference Hall, Kohima nung Kohima DC, Gregory Thejawelie NCS ketdangsuba kübok DPDB senden amenba noksa nung angur.

Dimapur, Rongjui/Sept. 15 (TYO): Kohima District Planning and Development Board (DPDB) pur ita shia amenba senden September 15, 2021 nü DPDB indang Conference Hall, Kohima nung amenba mapang society tenet registration atema jembia liasü. Iba senden ya Deputy Commissioner & Vice Chairman DPDB Kohima, Gregory Thejawelie NCS mendenpuba sür agia liasü.

Senden nung item society nungi teshimtet nübutemi pei society indang nükjidong rateta ashi. Item society ya Bumblebee Society, Upper Agri colony Kohima; Kohima District Amateur Boxing Association, High School Kohima; Kohima District Table Tennis Association, Officers Hill Kohima; Nagaland Table Tennis Association, AG colony Kohima; Bridge of Hope,

Perizie colony Kohima; De Operettas Music and Arts Society, Puro Complex, Supply colony aser Rev. Moa Longchari Cancer Foundation, Peraciezie High School Road nungertem alitsü.

Board ajanga iba onük tatsü-talang asadanga jembiba sülen screening committee ajanga recommendation agütsüba nung ajemdaker sorkar nem agizüka tim tinyaksü inyakdaksütsü atema abentsü lemteta liasü.

10th Northern Angami I-A/C nung Iconic Project 2021-2022 kübok lenmang ka cement agi monoktsü aliba melena Clock Tower ka yanglutsü lemtet aser State Planning Board nung nüngdakba mera agitsü atema Planning Department dangi yoktsü lemteta liasü.

Tseminyu Aspirational Block dak sendakba nung department shirnokisa küm pongu inyaksü

sentongtem magütsü ali, itemji Nodal department nem agütsütsü atema tan hopta agütsütsüla, ta Deputy Commissioner ajanga metetdaksü.

Deputy Commissioner ajangasa Sustainable Development Goals (SDGs) indang district level committee dang September 22, 2021 nü senden nung osangtsüsang tejangja renema bener arutsü metetdaksü.

Social Welfare Department indang District Welfare Office kübok department ajanga inyaksangshiba PowerPoint presentation ka DWO Akali Sema; Integrated Child Development Service (ICDS) indang CDPO James Ezung aser Integrated Child Protection Services Nagaland (ICPS) indang Programme Manager, Raitalie Zeliang nungertemi agüja liasü.

Wokha DPDB senden nung Lotha Dictionary saya



Wokha DC Conference Hall nung DPDB senden alidang Advisor IT, S & Tech and N&RE, Mmhonlumo Kikon-i Anglo Lotha Dictionary sayadang tangokba noksa nung angur.

Dimapur, Rongjui/Sept. 15 (TYO): Ita shia amenba District Planning and Development Board (DPDB) senden September 15, 2021 nü Deputy Commissioner, Wokha indang mapang Advisor IT, S & Tech and N&RE, Mmhonlumo Kikon-i Anglo Lotha Dictionary sayaa liasü.

Department of Art & Culture aser Lotha Academy lungjemer iba Anglo-Lotha Dictionary adokba atema Mmhonlumo Kikon-i tenüngsang agütsü, koba Lotha nung asoshi tongtipang lir.

State nung Art & Culture temaba jenjangi ajungketa alima dang asen sobaliba aser yimsü-yimbong sayutsü atema maparen jenti liaka iba kaket züluba ya Naga nung atema kanga tongtipang alitsü, kechiaser maparen balalaji arutsü aser aotsü, saka iba kaket yabo teti alitsü, ta Kikon-i ashi.

Advisor Kikon-i Yanbeni Yanthan aser Dr. Imlienla Imchen, Asstt. Professor Centre for Naga Tribal Language Studies, Nagaland University na danga pelaba lemsatapa liasü, shirnoki iba Dictionary yangluba nung

phonetic symbol tem amshiba nung yaritepa liasü.

Asen sobaliba aser shisatsü metettsü atema tanü-asüng tensa nung asen oshi nung kaket mesüra dictionary nüngdaka kumogo, ta pai ashi.

Director, Art & Culture, Adela Moa-i iba sentong nung jembiba, 2018 küm Planning Department ajanga Art & Culture Department dang Ministry of Tribal Affairs, Government of India (GOI) kübok Naga nung oshi balala nung Dictionary zülutsü atema Tribal Research Institute kübok maparen kar inyaksü shia liasü, kechiaser meimchir aliba lokti ya oshi-oben nung amendaker aser oshi ajanga jembishinüba kisüng masü saka puti otsü wazüka ayur, kin ka kenshi-oshi renloker, ta ashi.

Iba nung ajemdaker Directorate of Art & Culture den Yanbeni Yanthan aser Dr. Imlienla Imchen lungjemer Naga nung oshi-oben document asü tenzüka Lotha oshi nung tenzüker aser tashitemeteter, mongin aser department lungjembra ajanga iba dictionary ya adokteta liasü.

International Phonetic Alphabet amshiba Naga

regional dictionary nung iba kaket ya mezüngbuba alitsü, koba ajanga Lotha oshi jembirtem ajanzükba kisüng masü saka kaketshir aser tashitemeteter temi olasü shidak amshitetsü imlar, ta lai ashi.

Iba mapa atema district nung aliba nüburtem tenüng nung DPDB Woka indang vice chairman aser Deputy Commissioner, Wokha, Orenthung Lotha-i Department dang pelaba lemsatapa liasü.

Iba senden nung Government High School Sanis ya Government Higher Secondary School jenjangi ajungkettsü asoshi temaba ketdangsur dangi yoktsü lemtet.

Department of Agriculture ajanga district nung par department inyaksangshi indang PowerPoint agütsü aser Chief Medical Officer, Dr. C.W Tungoe-i district nung COVID-19 tensa indang osang agüja liasü.

Board ajangasa züngsem tasen SP Wokha Menangmeren; Asstt. District Education Officer, K.Ruby Humtsoe; SDEO Sanis, S.Lichio Yanthan; DEO (EVL), DFO Doyang H.Tokugha Chopy nungertem pelashishia agizüka liasü.

Mokokchung nung nisung tepsetba aitsür

Dimapur, Rongjui/Sept. 15 (TYO): Yimyu Ward, Mokokchung nung alir Imtioza Ao kinungtsü Easter Phom tepsetba atema Phom Union Mokokchung Town aser Phomla Hoichem Mokokchung Unit ajanga khukhua aitsür, ta Phom Union Mokokchung tir N Chuba aser Phomla Hoichem Mokokchung Unit tir Chongnyu nati sangdong ka ajanga ashi.

Nisung tasü mang ya September 14, 2021 nü nguteta liasü.

Nisung meimchir dak taochi mali iba ama mapa tamajung inyakba ya aoksar aser tanü-asüng lokti nung item amala mapa tamajung inyaker alitsü menüngdak, ta sangdong ajanga ashi.

Shidak angatetba senso aser lokti ajungai iba ama mapa ya aitsütsü ayongzüker aser tim ketdangsur dang tajungtiba nung bushisüngdanga aibelener tekeratiba nung aputsü ajungshir, ta sangdong ajangasa ashi.

Kohima District Disaster Management Authority senden menogo

Dimapur, Rongjui/Sept. 15 (TYO): Kohima District Disaster Management Authority (DDMA) senden ka September 15, 2021 nü DPDB Hall, Kohima nung mena liasü.

IDRN indang tongmelang agi rateta ashiba mapang, iba ya linük ajunga nung amshiba electronic inventory ka lir, kong osettsüset balala den nisung nübu amshia line department aser agency balalai district, state aser national level nungi meyoktepa lir, ta Senior Technical Director aser DIO, DIC Kohima, J.G Lorin Rengma-i ashi.

Ibai ajungben rongdak mapang teyari agütsütsü atema osettsüset, skilled human resources aser tongtipang osettem anepalutsü atema web nung ajemdaker amenoba sapang ka lir, ta ashi.

IDRN portal (idrn.nidm.gov.in) indang nükjidong tongtipangtibaji kodamasü lendong-tsüdong atalokba mapang nüngdakba hadir aser human resources aliba jangjatsü aser telemetba balala agitsü lir, ta pai ashi.

IDRN nung data update asütsü atema District Collectors mesüra Magistrate nem tashi agüja lir, shirnoki sendaktepa aliba department nung disaster management resources aliba indang osang tejangja metettsü aser District Informatics Officers indang teyari nung osangtsüsang balala portal nung upload asütsü, ta pai metetdaksü.

Iba senden nung CMO Kohima ajanga, September 10, 2021 nungi tanü tashinung COVID-19 positivity rare ya shilem 2.6 tashi ajema aluogo, ta metetdaksü.

COVID-19 wave tasembuba agi tajemba nung kongshitsü atema COVID protocol tem tanaben benoktsüla, ta lai ashi.

Kohima jila nung aliba sub-center mashi nung COVID-19 vaccine dose tanabuba Bohdbarnü agitetsü, ta lai metetdaksü.

Iba senden nung Deputy Commissioner, Kohima, Gregory Thejawelie menden liasü aser pai line department tem dang ita ka tsüngta disaster Management Action plan renemtsü metetdaksü.

Security Forces temi Dimapur nung OGW ka apu

Dimapur, Rongjui/Sept. 15 (TYO): Security Forces temi Police den lungjemer September 10, 2021 nü operation ka agiba mapang Nagaland Gate, Dimapur nung hadir bendena ayuba tesem ka ngutet aser OGW (over ground worker) ka pua liasü.

Osang tejangja ka angazükba nung ajemdaker Security Forces

temi State Police den lungjemer iba operation ya agidang Nagaland Gate, Dimapur nung PEK tapoktsü oset seret 4.75 nguteta liasü.

Iba ken o maneni asüngdangyatsü atema pua alisang den oset ya West Police Station, Dimapur nem agütsüogo, ta sangdong ka ajanga ashi.



Onok teyari nüngdaka aliba mapang Longden Longkumer, LL Construction Dimapur, Nagaland ajanga teyari agütsüba atema pelar, ta Mokokchung District Disabled Forum (MDDF) sangdong ka ajanga ashi. Par kibong dang kanga pelar aser Tsüngremi nür wadang nung tali moajang ta sarasademtsür, ta MDDF tir lmkongnungchet Kichu-i sangdong ka nung ashi.

Tinsukia-Mohanbari highway nung IAF tayimtsü anenzüksü



Guwahati, September 15, 2021 (Agencies): Assam kübok Tinsukia aser Mohanbari sendaktepba national highway nung Indian Airforce fighter tayimtsü anentsü atema shimogo.

Centre-i iba ya emergency aircraft landing strip ama amshitsü.

Centre-i national highway 12 shimba nung Tinsukia-Mohanbari highway densemogo.

Tinsukia-Mohanbari

highway ya the IAF indang Chabua Air Force station ajanga süir.

Ano, Assam nungsa emergency mapang IAF tayimtsütem anentsü atema gari lenmang pezü shimogo.

Lenmangtemji- Jorhat-Baraghat road, Bagdogra-Hashimara road, Hashimara-Tezpur route aser Hashimara-Guwahati road lir.

India nung emergency mapang IAF indang tayimtsütem anenzüksü atema

shimtetba gari lenmangtemji:

Phalodi-Jaisalmer road, (Rajasthan), Kharagpur-Balasure road (West Bengal), Kharagpur-Keonjhar road & Panagarh KKD, Chennai (Tamil Nadu), Nellore-Ongole road & Ongole-Chilakaluripet road (Andhra Pradesh), Mandi Dabwali to Odhan road (Haryana), Bhuj-Naliya road & Surat-Baroda road (Gujarat), Banihal-Srinagar road & Leh/Nyoma area (Jammu and Kashmir).

Assam sorkari benjung atema SOPs latettsür

Guwahati, September 15, 2021 (Agencies): Benjung mongpu atongba nung ajemdaker Assam health minister Keshab Mahanta-i COVID-19 indang SOPs tasen kar metetdaksüogo.

"Virus indang tebilemstü melii benjung amongtsü atema onoki SOPs lateter" ta Assam health minister Mahanta-i ashi.

Puja committee shiai pei pei Deputy Commissioner tem dang nungi puja ayongzüksü atema temelaba meshitsüla aser committee züngsem shia vaccine agitsüla ta SOPs nung shia lir.

Benjung nung adentsüpur arishi küm 18 ser temapurtem

COVID-19 vaccine indang dose kabosa agir asütsüla. Arishi küm 18 ser teküpokpurtembo iba tenokdangba nung madener ta SOPs nungsa metetdaksüogo.

Puja pandal tem nung exit aser entry points balala ana alitsüla aser pandal ajak nung hand sanitisers aser masks ayutsüla.

Durga Puja indang anogo pungububa aser terbuba nung putirtem aser core committee züngsemtem tendangtsüla, ta SOPs nungsa shia lir.

Mozü agi Puja mandaps merüktettsüla aser süngyangu tila amshitsüla ta Health Minister Mahanta-isa metetdaksü.

Tripura sorkari TET ajangba SSA tesayurtem regularize sütsür

Agartala, September 15, 2021 (Agencies):

Mongulbarnü Tripura sorkari Sarva Siksha tesayur ajak nem facility agütsütsü telemtetba agiogo. Iba ya Tripura High Court-i lemtetba ama inyaker.

National Council for Teacher Education (NCTE) tetuyuba alema education teachers regularize asütsüba indang tebilemstü lir aser iba ajanga tarutsü nung timtem ajurutsü akok kechiyong tesayurtem rongnung parnok 45-i dang Teacher Eligibility Test (TET) nung takok nguogo.

Parnok nem tangar tesayur

nem agütsüba ama itasen agütsütsü.

SSA ajanga shimokba tesayur 4,442-i D.El.Ed degrees nguogo saka parnoki TET nung ano takok mangu lir.

Külen, tesayur 195-i D.El.Ed mesüra B.Ed degrees nguteta mali. Tesayur 45-i secondary school dang azüng.

Iba jagi parnok Right to Education Act den külemi qualify asütsü atema tetsükdaksü lir.

Tripura High Court-isa state sorkar dang tesayurtem regularize asütsü atema special scheme ka tenzüksü shiogo.

GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA

NO. HED/GIA/2011-12/ /Dated Kohima, the 13th Sept. 2021

NOTIFICATION

Eligible Private Secular Colleges and Government permitted Theological Colleges are hereby informed to download the Grant-in-Aid form for the year 2021-2022 through the Department's website www.highereducation.nagaland.gov.in and submit the filled up form to the undersigned from 20th September to 4th October 2021. Forms will not be accepted after the stipulated date.

(Dr. APENI LOTH) DIRECTOR HIGHER EDUCATION

Issued by DIPR



वनीज्या उत्सव

THEME - Showcasing India as a Rising Economic Force

INAUGURAL PROGRAMME at URBAN HAAT, Dimapur
21 September 2021, 10:00 am

STATE LEVEL EXHIBITION ON EXPORTS & SESSIONS
21-22 September 2021

Shri IMNATIBA, Advisor of Industries & Commerce, Labour & Employment, Skill Development & Entrepreneurship will grace the inaugural as Special Guest

Organised by

APEDA, DGFT and Industries & Commerce Department, Govt. of Nagaland



Taoba mapang United Liberation Front of Assam (ULFA) tanishir Dwipen Khataniar noksa nung angur. COVID-19 wara ajanga lockdown alidang tesüiba mapang ULFA tanishir Dwipen Khataniar-i aou agi osettsüset yanglutsü tenzuka liasü aser tanü pa bamboo artisan tajung ka kümogo. Khataniar ya Bajali district kübok Pathsala nunger lir aser par kidang aou agi kechisarena yanglur. (Bajali, September 15)

Mizoram nung nisung 1100 tema dak COVID-19 putet

Aizawl, September 15, 2021 (Agencies): Bodbarnü Mizoram nung nisung 1185 dak Covid-19 aliba putetogo. Parnok züngsema nisung akak ajak agi 74,068 kümogo.

"Tesüiba ghonda 24 tsüngda Covid-19 agi shiranger nisung 2 asü aser tena züngsema tasür 246 kümogo" ta Information and Public Relations department-i metetdaksü.

Tanü putetertem rongnung tanur 240, Central Reserve Police Force (CRPF) jawan 5 aser health care frontline worker ka dena lir, ta parnokisa ashi.

Bodbarnü COVID-19 aliba putetertemji Aizawl district nung 620, Lunglei district nung 116 aser Kolasib nung 92 lir.

Mizoram nung tang nisung 13,525 anepaludar aser 60,297 taneptsü nguogo.

Tang tashi nung COVID-19 alitsü akok ta temolung melemi bilemba sample lakh 9.83 shi tendangogo.

"Mongulbar tashi nung nisung lakh 6.65 nem vaccine agütsüogo aser iba nungi nisung lakh 3.21-i dose anaprong agiogo" ta state immunisation officer Dr. Lalzawmi-ia ashi.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 16, 2021

Asenok atema teimla

Nagaland nung angh inyaka alisang R.N.Ravi tanga state-i belena bener aoba den külemi ano, Naga yimten tebilemstü ya tatem küma telatetba ka dangi arutsü asoshi India government tenüng nung Naga nunger linük tenzükertem den jembitsü asoshia pa melen tangar ka shimba telemtetbatem yagi Naga nunger nem Naga yimten tsütsü teimla tasen ka agütsür. Nagaland nung alir nübertem asoshibo R.N.Ravi ya angh tajung ka liasü. Pa küm ana angh inyakba mapang nunga pai Nagaland nung ochimashi mapatem ajema kümdaktsütsü kanga merangogo aser Nagaland akümertem nema parnok dak alang aküm aser tetushi agüja inyakogo. Ajisüaka, ajak atema tia majung kaji, Naga yimten tebilemstü ken o tatembang küma latettsü merangba maparen nung, NSCN-IM telok o Ravi na tsüngda tangatetep kati marutetba ajanga tetenzükbo kanga junga tenzükertem ser nung tatembang kati marutet, Naga yimten ken o jembidak sabang nungi R.N.Ravi pilatsüsa kümogo. Atangji, nisung melenaka Naga yimten ken o lemteptsübaji, India government o NSCN-IM na tsüngda 2015 küm August 3 nü NSCN-IM den India government tenüng nung Ravi-i sign asüba "Framework Agreement" nung amendaker lemteptsüsa adoktsü. Iba tangatetep ken o ya Naga yimten kimong mesemtettsü asoshi ar ladangba mapa ka dang asünungji, kimong nungji Naga nunger kiji komaka asütsüar tejangja shia mali, iba jagi tang kisütsü mapang tonger, ki metenzükertetsüsa mangatetep adoker. NSCN-IM teloki ashibaji, Naga nunger ya India kübok masü saka India den alitsü, anungji Naga nunger temzüng aser wako balala amshitsü. India government-i magizükertetbaji aji lir, India government-i tang India temzüng nung Nagaland asoshi arla 371(A) nung yimten jenjang balaka yutsüba amai ano tajungba jenjang nung yutsütsü mulunga lir aser Naga nunger wakojia government office-tem dak alaka Naga nunger sobaliba aser loktiliba tentet aser sentong ajak nung amshidaktsütsü mulunga lir, saka NSCN-IM teloki Naga nunger temzüngjia India temzüng den memeyoktepi balaka sünür aser Naga nunger wakojia sobaliba aser loktiliba telongjem asoshi dang masü saka yimten wako sünür. R.N.Ravi o NSCN-IM na majurteptetba ken o ji aji liasü. Ashiko, R.N.Ravi melensang jagi NSCN-IM telok dang kasa o ji ashitsüa akok, kechiyong parnok ajaki Naga yimten ken o bo renema jembiadokogo ta aiben metetdakja lir. Ajisüaka, nisung melenba denji shisatsü aser tangatetbaa melener, anungji R.N.Ravi melena arurang A.K.Mishra-i Naga yimten ken o ya tatembang küma latettsüsa shisatsü tasen ka bener arutetra, iba jagi Naga yimten tebilemstü agi alima rajang kümdaktsüba tashidak ya aneptsütsü imlar. Tanüa Nagaland ajaklen Naga yimten nüchiso bushir telok tenüng nung saru tali saruba metizükert, shishilembaba mapa inyakertem mapa meinyak longkak aita amonger. Joko, achiyonga koya, machiyonga koya ta asüba amato, Nagaland nung saru saruba aser commission agiba mapatem tapu ajak ya telongpurtem dang atonger. Iba jagi telongpurtema tali tenüngmenük alur. Ajisüaka, Naga yimten tebilemstü onük ya tatembang kati arua melatetett tashi telongpurtem saru ya agütsür magütsübu arutsü. Bilemdangdi süra, saru mesaru nung linük tenzükertem kechi chiyonga alitsü aser kechi agi yimten mapa inyaka jajatsü. Aji oda, state government-i dena sarur agütsütsüsa akümtsü. Tanüa iba ama timtem jagi Nagaland nung kilentsüa meyaglütet aser yimdong nung light-a metsülöktet, pei sarunütsü saruba sarur, commission-a agir aser telongpur tenüng nung pei kija takar akümtsü meranger ta lia lia kibo topur tajung aika yangluteta angur saka yimdongbo tesempatsüka, garibo tajungtetsa senzüa angur saka lenmangbo majung ta Nagaland meimer mali saka saru sarurbo aika ta küma odagi. Item tebilemstütem ya mali küma samatsütsü asoshi teinyaktsü mapa ka dang lir, ibaji India den Naga yimten ken o ya telemtetba kati arutsüla. Joko, nisung melenba agia majungtsü aser government melenba agia majungtsü, saka India telongjem kübok asüyonga Naga nungerji Naga nunger ama alitsüsa yimten jenjang ka alangtettetba, iba jagiang, Naga lima nung tax aser commission agi taküm alir kibong aser lokti ka danga mali, ajak pei akok mapa inyaka, jangratema tesünep aser yimjung nung aliba putu ka tenzükertetsü. Idangjibo, sarui aotsüa mapang mangutsü, commission system-a malitsü saka mesaruyonga mapa tajung asoshi temulunger tenla agütsür aika adoktsü. Iba teimla nung asenok ajaki Naga yimten tebilemstü tatem küma latettsüba maparen nung pei akok shilem tajung agitsü kanga nungdaka kümogo. Iba khuret ya telongpur kisung khuret masü senso ajak khuret lir.

OLEMSABANG

Koda inyak nung 'Clean Election' takok angutsü...???

~ L.Kika Pongener.

Tir Yimyim olemsabang nung, theologian, scholar, senior citizen, tashitemeteter aikati 'Clean Election' onük nung ocet aika zülua lemsatepogo. Ano 'Yanglushidi Sensaksem Sabang' (YSS) nung osang zülur aser shisashir aikati Clean Election onük nung lemsatepba ajanga aika tajangzük ngua zünger alitsü sudi. Tanü asen Naga nunger meyongnem agüja 'Tatar' shimba yayim (Election) inyakyim nung temelenshi/teyanglushiba ka kanga rongdaka kümogo (Burning issue). Otsüla-oboula nunger mapang nungi India nunger Election ya magiba mapang tashi, yimtsüng 'Putu Menden' nung kidong shia pei pei tata shilang alanger kanga dang metsüngareta yimsüsüa aru. Ajisüaka, kodang Naga lima-i Election aru, asen Naga nunger yimtsüng shia nung yimsüsürtem, kar dak alaka/teimba ka otsüla-oboula nunger mapang amai metsüngareta masü pongpa-pongpa-a küma-adokogo. Iba ya kechi ajanga yamai ladak-ladaka küma-adok (?)...ta jungjunga bushidangra, ya tanga kecha agi masü, saka Election nung yimsüsürtem tazüng nungi talak tashi sen agi alizüktepbba ajanga yamai küma-adok. Election-i yinur Candidate-temi pei adoknudang/shimdaktsünudang sen taluposa lemtsüba ajanga yamai küma-adok. Sürabangla, iba ya yimsüsürtem tai asü (?) Election-i yinur Candidate-tem tai asütsü (?) Asenoki kanga junga shisadangra, candidate/yimsüsür/nutsüng-nübur ajak tai asütsü. Candidate-temi sen melemra shir dang senji meshitsü (?) Senji taluposa aleyongga ochishir yimsüsür-ibo senji magitsü, aser senyong ayoker yimsüsürji nutsüng-nübur/pei kidongi Putu menden nungi anendaktsütsü koka lir, saka nüburtema dena sen nung alangba agi ola madoki anidaker. Tanabuba nung, kodaser Assembly nung 'Tatar' amentsü atema tetemsa nubu meshimteteter (?)...ta jungjunga bushidangra, Pei yimtsür-yimer, pei meposanger, pei kin-kidong apia, mesüra rongsen dak rangloker Candidate shimba/adokdaktsüba agi tetemsa nubu meshimteteter. Kechiyong yimsüsütsü sempet tajung, ochishir, 'Tatar' asütsü tetemsa nubu tajung asüyongjia, sen makara election-i meitetsü aser aiyongjia madoktsü. Ano Naga limaji 'Try State' ta yimyim ayimoktsür joko putu ana songtema arur, saka kodang election arudir kinuk ajaklen ya bottle agi sunga merepshia angudang, Try state yimyimji kecha tetezü mekai küma-adoker. Ano election mapang raratep/tsükchitap adokba ya kodaser, kong nungi adoker ta reprangdangra, Party shia nung Candidate-temi Election kimen/Youth kimen shima ayuba ajanga raratepa/züktepbba tapu ajunga ya adoker.

Sürabangla, Election meruk-meruka agitetsü asoshi kechi inyaktsüla (?) Election nung Candidate-temi sen malemstüla, yi mamshitsüla, Election kimen mayutsüla, Election-i yinur ajak talenba kecha mekai yitetsüsa lenmang sadema-sadema lapoka yutsütsüla (Free and fair election). Taoba election nunga ABAM-i anir arogotem nung tenzükertem, arogotsür, laishir, kaketshir, watsü-rogo, itum telok ajaki Clean Election takok angutsü atema meranga inyakdangogo. Watsü-rogo aser arogotsürtemi sungküm nung nokdaker ya shibelenba meita reprangba, arogo-i acha-ayanga pei vote sen yong mayoktsü tenangzükba 'Format' nung sign sudaktsüba, kibongtem nung clean election maittsü (Sympol) 'Nisan' temesung songa ayuba, sen melemdaktsütsü atema meita reprangba, yamala mapa aika meranga inyakdangogo. Ajisüaka, imlaba amai takok mongutet, kechiyong kar dak alaka yimtsüng teimba ka nung, yimten yimsüsür telemtetba anema arogo/laishir/kaketshirtemi practical nung tasü-ita menokdaktetba agi tamakok angu sudi ta bilemer. Ajak dak alaka, asen Naga nunger tebang agi tapu aika jembi yongjia kodang sen talep ngudir sen dakji teimba mettsüdaker alanger. Sentong tapu aika yangluyongjia sen meshiba yimya supaba ya meintokra kodanga Clean Election-ji takok mangutsü. Ni kü temeden vote sen yong mayoktsü...ta tenangzükba sign sudaktsüba agia takok mangutsü, kechiyong nisung mulungjangsa tekülakba.

Lenir tajung aikati Mizo lima nung arogo-i/laishirtemi anir tasü-ita sentong tajung yanglur inyakba agi Clean Election takok anguba indang lemsatepogo. Ni ashitsübo, Mizo nunger o Naga nunger tangatetbaji khenyongi balala. Mizo lima nung arogotemi sen aruba küli tejangja mesayutetba nungi 'Tershilem' abenbabo arogo-i magizükertem ta angazük, saka asen Naga nunger arogotemibo yamaji meinyaktsütsü sudi. Aji oda, arogo-ia dena sen dang nunga ta meshitetra tanga lokti-tentet aser nüburtemjibo koda asütsü...!!!??? Anungji 'Clean Election' ya takok ngua inyakdi ta bilemra, tangar kintem khen toktsür, asen Ao lima nung danga takok angutsü atema, Ao Senden-i acha-ayanga, Watsü Mungdang, Ao Kaketshir Mungdang, ABAM, ABTM, lim arogotem aser laishirtem ajunga nungi teshimtet nubu (Representative) jateper, lokti senden ka lia, pangzüng (Resolution) kar renema sign suteper inyak nungbo takok angutsü sudi ta bilemer. Aji oda, Ao Senden-i khuret aben nungang takok angutsü, kechiyong Ao Senden dakji Tsükong Mungdang/Yimtsüng Putu Menden ajunga sendaka lir, Ao Kaketshir Mungdang dakji Tsükong Kaketshir Mungdang/Yimtsüng shia Kaketshir Telongjem sendaka lir. Watsü Mungdang dakji Tsüngkong Watsü Mungdang/Yimtsüng shia Watsü Telongjem sendaka lir. ABAM dakji lim arogotem/laishirtem ajunga sentaka lir. Kodang itum lokti-tentet ajunga jagi pangzüng (Ressolution) nungji sign sudir, ibajagi yimtsüng shia nung Putu Menden dena soittetsü takoktsü lenmang lir ta bilemer.

Küm ishika suiogo, lanurtemi anir ULB Election magidaktsütsü atema sorkar anema longjemmer nokdakba takok nguogo. Iba tobo Assembly nung Tatartemi lemtetba anema inyakba mapa ka liasü, saka sorkarji nübur meyong asünung, nübur memulung nungji sorkar tamakok nguogo. Linuk temzüng nunga 'Free and fair election' shia lir, anungji, 'Clean Election' atema temzüng-ozüng yanglur inyakba nungbo kecha aibelen malia ta bilemer. Aji oda, temzüng-ozüng takhang ka nung pangzünga sign suteper meinyakra takok mangutsü sudi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Andhra Pradesh nung coronavirus wara mapang Khristan charity telok- Share & Care Foundation-i sensakertem nem chiyungtsü lema agütsüba noksa nung angur.

India nung Foreign Funding nokdangba ken o SC-i angadangtsü

September 15, 2021: India nung Khristan organizations densema organisation balala dangi bendanglen nungi senotsü teyari aruba sorkari nokdangba anema temepishiba ken o ka benoka lir, aser item temepishiba ken oji Supreme Court-i angadangtsü melungogo.

Yaküm September ita nunga India nung Union Home Ministry-i bendang linüktem nungi senotsü teyari anguba nokdangtsü atema Khristan organization pezü indang license thinenja liasü.

Melungtet telok balalai Supreme Court dang, India sorkari Foreign Contribution Regulation (Amendment) Act (FCRA), 2020 ozüing yanglushia foreign funding nokdangba ajanga parnoki inyakba charity mapa nung tamakok angur, ta shia temepishiba ken o agütsü.

September 7, 2021 nü Justice A. M. Khanwilkar-i aniba bench kati FCRA ozüing yanglushitsü atema melungtet telok balalai benokba ken oji angadangtsü agizükogo aser Supreme Court-i sorkar danga hopta asem tsüingda telangzüba agüjang, ta tuyuogo.

Melungtet teloktemi agütsüba temepishiba ken oji maneni October 5 nü angadangtsü.

SC nem temepishiba ken o agütsürtemji Andhra Pradesh nung aliba Share & Care Foundation nungi Noel Harper o Nigel Mills na aser Telangana nung National Workers Welfare Trust nungi Sister Lissy Joseph aser Annamma Joachim na lir.

Temepishiba ken o nungji parnoki yamai shia lir, sorkari foreign funds nokdangba ajanga linük nung sensakertem aser nungdabapurtem meyariteter.

Iba dak alia 2021 küm June 30 tashi nung New Delhi nung aliba Indian multinational public sector bank ka nung bank account lapokang, ta sorkar ketdangseri tuyuba ajanga melungtet teloktemi timtem ajangshir, ta parnokisa metetdaksü.

Temepishiba ken o benokertem atema ken o jembitsür, advocate Gopal Shankaranarayananana-i, "Linük nung bendanglen nungi donation anguba melungtet telok 23,000 shi lir aser parnok dang New Delhi nung aliba bank ka nung account lapokang ta tuyubaji inyakyim nung mapet," ta metetdaksü.

Sorkar tenüing nung jembir Additional Solicitor General Sanjay Jain-i SC dang nenoki tuyuba ama sorkari telangzüba agütsütsü, ta shiogo.

Jain-isa, bendang linüktem nungi senotsü aruba mita reprangtsü aser senotsü tim masüba nung amshiba nokdangtsü atema FCRA ozüing yanglushitsüsa aküm, ta metetdaksa liasü.

Yaküm September ita nung sorkari license anentsüba Khristan organization tem rongnung New Life Fellowship Association, Evangelical Churches Association of Manipur, Ecreosoculis North Western Gossner Evangelical aser Northern Evangelical Lutheran Church densema lir. Item license ji makaibo Khristan organization temi bendanglen nungi yokba senotsü teyari magitetsü.

Khristan lenirtemibo, Centre nung BJP-i aniba sorkari Hindu nung onüktem ataloktsü atema Khristan organizations indang FCRA licenses agientsür, ta aitsüogo.

2017 küm US nung amenoka aliba Khristan organization-Compassion International-i ashiba agi, parnoki India nung chiyungtsü agi anüingba tanur 100,000 atema senotsü teyari agütsüogo, ajisüaka parnok indang FCRA licenses thinentüba sülen iba maparen tembanga liasü.

Ministry balalai Afghan Khristantem den tongtepratep mesüteter

September 14, 2021: Mission Network News (MMN) osang ajanga ashiba agi, Afghanistan nung Taliban teloki yimsüsüba tenzüka sülen joko Khristan underground ministry balalai Khristantem den tongtepratep mesüteter, ta metetdaksü.

Afghan nung Khristan ka tenüing agi, Abdar dak sendakba nung osangbenertem den jembidang FMI nungi Nehemiah-i, "Tesüiba ita ishika pa onok den liasü. Pa ya Afghanistan nungi aser Pakistan nung azüinger. Taoba ita pai evangelism atema Afghanistan-i aotsü ta metetdaksa liasü. Joko tesüiba hopta ka shi onoki pa den tongtepratep mesüteter," ta metetdaksü.

Taküm August ita tomlen

nungi tenzüka Taliban teloki Afghanistan yimsüsüba sülen iba linük nungi underground Arogotem den inyakba Khristan ministry aikati Khristantem iba linük nungjagi anitetsü meranga liasü. Joko tangbo ministry balalai parnok networks aser partners den tongtepratep mesüteter.

MMN-i ashiba agi, Afghanistan nung reshikangshi kanga aliba agi Khristantem aikati pei yimsü kanga mimshir, aser tang Taliban yimsüsüba kübok Khristantem ano taliba reshikangshitsü.

FMI-i ashiba agi, Taliban teloki Khristantem dak tenük yoker aser Khristantem dang adenshia tekülem sentong magitsüla, ta amokmerenogo.

"Shidi ka ajanga Khristan ka dangbo joko par kiji Taliban

meyong ta metetdaksüogo. Pa ya osettsüset yanglur tongmelang nisung ka aser pai aazükba sen ajak agi kiji yanglua liasü, saka tang nungibo Khristantem meyong kiojen ajak Taliban meyong akümtsü," ta Nehemiah-i Mission Network News (MMN) nem metetdaksü.

Afghanistan nung Khristan nütsüing timbaka Islam yimsü toktsür Khristan yimsü agizükertem lir. Tang Afghanistan nung Khristan nütsüing 8,000-12,000 shi lir. Afghanistan nung Muslim nung nütsüing timba aser minority teloktem rongnungbo Khristan nütsüing timba, ibayongji Islam yimsü alia amangertem aser Islamic kiralongratemi Khristantem tamajungba reshikangshir.

ANOGO ABEN TSÜNGREM DEN

Maneni sarasademang

Sarasadem nung maneni akangakanga liang, aser idakji tenüingsang agütsüba den saksalema liang. Kolosi 4:2

Kolosi nung aliba khristantem ama alitsü Pauli tetuyuba agütsü. Kati ka khu bentepbang, kati ka dang tai toktepang, meimtepang, Khrista Oji ne dak mungdakjang (Kolosi 3:13-16). Kechisa inyakdir mulungsoa aser Yisu tenüing nung inyaktsüla ta Pai parnok dang ashi (t. 17, 23). Idangji pai parnok sasa sarasadem nung akangakanga alitsü ashi. Akangakanga tetezü tanen makai. Asenoki tanen makai inyakba jagi Tsüngremi asenok sarasadem langzütsü ta amangba sayur. Asenoki aji metet saka Tsüngremi asen mapang nung asen sarasadem melangzür. Saka asen tamangi asenok nem mapa pezü bilemtetdaksür. 1) Tsüngremi asenok tia metet kechiaser Pa ajak Metetsang. 2) Asen tia tiyong nung Tsüngrem asenok den dena lir, kechiaser Pai ajak metet. 3) Tsüngremi Pa mapang nung asenok sarasadem langzütsü. 4) Asen asoshi Tsüngremi tajungtiba telangzüba agütsütsü.

Nai langka asoshi mesüra kar asoshi maneni sarasademtsü aniadokra, idangji item onüktem ya bilemtetang: 1) Renema liang (temulung makai teküm), aser 2) Tenüing sangang. Tasen Lai ajunga nung Pauli asenok dang tenüingsang agütsütsü indang ashir. "Kecha nung temulung tatemala saka ajak nung sarasademba aser mepishiba aser tenüingsang agi nenoki meshiba Tsüngrem nem metetdaksü" (Fil. 4:6). "Teti pelaang, maneni sarasademang, kechisarena nung tenüingsang agüjang" (1 Tesa. 5:16-18). Asenoki maneni sarasademtsüla aser asenoki teti tenüingsang agütsütsüla. Tsüngremi tajung ajak aser tabensa sempet agütsür (Yakob 1:17), tang aser teti tatem makai. Ibaji asoshi asenoki tenüingsang agütsütsüla.

Oba, tangar asoshi aser ni asoshi bendanga agüja sarasademba taküm ka ni kümjang.

Pochury Baptist Arogo nung Clean Election Movement tenzük



September 14, 2021 nü Pochury Baptist Church Meluri Town nung Clean Election Movement tenzükba sentong nung ADC Meluri, K. Fürhesie Nyuwi-i jembiba noksa nung angur.

Dimapur, September 15 (TYO): September 14, 2021 Association Tir, Sürhotshü, General Secretary Pochury nü Pochury Baptist Church Hoho, Sierhosie, Pochury Meluri Town nung Pochury Student's Union Tir, Müphatho Baptist Church Council-i "My Vote My Future' omen nung Nyuthe aser Pochury GB Union Tir, Lüpuchu nungeria ajemdaker Clean Election Movement tenzükogo, ta o tatsütsü jembi. Executive Secretary Rev. osang ka ajanga metetdaksü. Rümatho Nyusou-i Clean Iba sentong nung tongti o Election Movement tenzüksü jembirji ADC Meluri, aser paisa Tsüngrem K.Fürhesie Nyuwi liasü. temoatsü meshia sarasadem. Kasa sentong nungsa Iba sentong nungji Arogo Pochury Baptist Church lenirtem aser lokti tentet Council Tir, Dr. Mosa Tsang, balala nungi lenir 60 shi dena Pochury Mother's liasü.



September 15, 2021 nü New Delhi nung Lok Sabha Speaker, Om Birla-i 81buba All India Presiding Officers' Conference aser International Day of Democracy sentong nung jembidang tangokba noksa nung angur.

Petrol aser diesel saru GST küboki aitdaksütsüa akok

New Delhi, Rongjui/September 15 (Agencies): Hokolbarnü GST Council senden amentsü aser iba senden nungji petrol, diesel aser tanga petroleum products saru ajak GST küboki aitdaksütsü atema jembitsü, ta osang ka ajanga metetdaksü.

GST Council nung Central aser states finance minister tem densema lir. Hokolbarnü Uttar Pradesh yimtiba, Lucknow nung senden amenba mapang nungsa COVID-19 essentials nung saru atema jembitsü, ta osang angazüker.

Tang India nung petrol aser diesel totzü jenjang kanga atuba sülen iba tebilemtsü bentettsü atema GST kübok item totzü jenjang aitdaksütsü atema bilemdar, kechiyong iba ya ajanga saru nung saru bendenlokba ajemtsü.

Taküm June ita nung Kerala High Court-i GST Council dang

petrol aser diesel na ya goods and services tax (GST) küboki aitdaksütsü atema metetdakja liasü.

GST nung excise duty ama central saru inoksem aser July 1, 2017 nungi state temi petroleum goods pongu- petrol, diesel, ATF, natural gas aser crude oil nung VAT saru agir.

Tang petrol aser diesel jenjang tesadang shibo Central excise aser state VAT saru lir, anungji kodang totzü ana ya GST kübok aitdaksüdir saru shilem 28 tashi dang agitsü.

Saru dak sendakba mongintemi ashiba agi, petroleum products ajak GST küboki aitdaksütsü atema telemtetba agitsüji kanga tasak asütsü, kechiyong itemji GST küboki aitdaksüra Centre aser states sorkartem kanga takoksa angutsü.

GST kübok saru aruba ajungaji Centre aser state

tsüngda kasasa (50:50) lemsatsü.

September 17 nü Union Finance Minister, Nirmala Sitharaman leniba nung amenba GST Council senden nungjisa 2022 küm June ita tashi maneni compensation cess agitsü atema jembitsü.

Coronavirus wara prok tenzüka sülenbo tang mezüng GST Council nung züngsemtem tesem ka nung külemi adenshia senden amentsü.

Tesüsabuba GST Council senden June 12 nü video conferencing ajanga mena liasü aser iba mapang nungji September 30 tashi COVID-19 essentials nung saru ajemtsü lemteta liasü.

Goods & services tax kübok Remdesivir aser Tocilizumab ama coronavirus mozü balala den medical oxygen, oxygen concentrators aser COVID-19 essentials nung saru ajemogo.

Sept. 17 nü 21buba SCO senden nung PM Modi adentsü

New Delhi, September 15 (Agencies): September 17 nü Tajikistan yimtiba, Dushanbe nung 21buba SCO (Shanghai Cooperation Organisation) Council of Heads of State senden amentsü, aser iba senden nung Ato kilonser, Narendra Modi-a adentsü.

Iba senden ya Tajikistan Tir, Emomali Rahmon leniba nung amentsü.

SCO senden nung Ato kilonser, Narendra Modi leniba

nung India ketdangsertem adentsü aser video-link ajanga SCO senden nung shilem agitsü, ta India external affairs minister, Dr. S Jaishankar-i metetdaksü.

SCO senden nung SCO züngsem linüktem, observer linüktem, SCO secretary general, SCO Regional Anti-Terrorist Structure (RATS) executive director, Turkmenistan Tir, Gurbanguly Berdimuhamedow aser tanga tejaokertem adentsü.

Tang mezüng SCO senden ya hybrid format nung agitsü aser India SCO züngsem akümba sülen tang agi pezübenbuba iba senden nung adentsü.

Iba senden nung lenirtemi tesüiba küm 20 tsüngda SCO-i inyaka aruba mapatem asadangtsü aser tarutsü nung maneni amalitepa inyaksü atema o lemteptsü. Kasa senden nung regional aser alima dak sendakba tongti onüktem nung o lemteptsü.



September 15, 2021 nü Bhopal nung Madhya Pradesh Chief Minister, Shivraj Singh Chouhan-i Dengue tashidak nokdangtsü atema campaign tenzüksüba sülen tangokba noksa nung angur.

2020 küm India nung anogo shia nisung 80 shi tepset: NCRB

New Delhi, September 15 (Agencies): 2020 küm India nung anogo shia nisung 80 shi tepset aser küm piyong nung nisung 29,193 tepsetogo; nisung timtiba tepsetba state ji Uttar Pradesh liasü, ta Bodhbarnü National Crime Records Bureau (NCRB) data ajanga metetdaksü.

2019 küm India nung nisung 28,915 tepseta liasü aser 2020 küm nungbo shilem kati nisung timba tepset, ta NCRB-isa metetdaksü.

Ajisüaka 2019 küm den medemdangra 2020 küm nung nisung puer aoba tatalokbatem tajemba liasü. 2020 küm nisung puer aoba ken o 84,805 liasü aser 2019 küm nungbo nisung puer aoba ken o 1,05,036 liasü, ta Union Home Ministry kübok inyakba NCRB-i metetdaksü.

2020 küm India nung nisung timtiba tepsetba state ji Uttar Pradesh (nisung 3,779) liasü, iba sülen Bihar (3,150), Maharashtra (2,163), Madhya

Pradesh (2,101) aser West Bengal (1,948) state tem lir, ta NCRB-i metetdaksü.

Yaküm Delhi nunga nisung 472 tepsetogo.

Asürtemji shilem 38.5 bo arrshi küm 30-45 tsüngdapurtem liasü aser shilem 35.9 arrshi küm 18-30 tsüngdapurtem liasü. Asürtem shilem 16.4 arrshi küm 45-60 tsüngdapurtem aser shilem 4 arrshi küm 60 ser temapurtem liasü. Tanüngbaji tanurtem liasü.

Ano India nung 2020 küm nisung puer aoba ken o timtiba aliba state ji Uttar Pradesh nung 12,913 liasü, iba sülen West Bengal (9,309), Maharashtra (8,103), Bihar (7,889) aser Madhya Pradesh (7,320) state tem lir.

Yaküm Delhi nunga nisung puer aoba ken o 4,062 liasü.

Indian Penal Code aser special & local ozüngtem nung ajemdaker India nung NCRB-i ozüng alema inyakba osang tejangja bendena asadanger.



September 15, 2021 nü Ahmedabad nung tzünglu sashia aruba sülen Sarangpur area nung ki ka chireper aliba noksa nung angur.

BJP-RSS ya taila Hindu nungertem lir: Rahul Gandhi

New Delhi, Rongjui/September 15 (Agencies): Bodhbarnü Congress Party lenir, Rahul Gandhi-i, BJP-RSS ya taila Hindu nungertem lir, aser parnoki tajangzüik angutsü atema tamanga yimsü amshir, ta aitsüogo.

All India Mahila Congress foundation day sentong nung jembidang, Rahul Gandhi-i, Congress aser BJP-RSS na tangatetbaji khenyongi balala, aser item tangatetba rongnung kati dang linük yimsü sütettsü, ta ashi.

RSS tangatetbatem aija Rahul Gandhi-i, "Hindu yimsü angatetsang aser benschisangji Mahatma Gandhi liasü. Mahatma Gandhi-i-Hindu yimsü angatet, süra kechiba RSS tangatetba ajanga pa (Mahatma) teku nung injang asem khaloktsü?," ta asüngdang.

"Mahatma Gandhi ya tatishitsü sayur ka. Tashiyim mamshitsü atema pai jungjunga angateta liasü, aser tashiyim mamshibaji Hindu yimsü tamendakdak, süra kechiba RSS tangatetba alisang, Sarvarkar tangatetba alisang, Godse-i pa

(Mahatma) khaset? Ni tanga tangatetbatem den ai-aura akatsüa akok saka ni kodanga RSS aser BJP tangatetba denbo ai-aura makatsü," ta pai ashi.

BJP ya taila Hindu nungertem lir, ta shia Rahul-i, "Parnok ya kechi komala Hindu? Parnoki Hindu yimsü amshir, parnoki tamangba yimsü amshir saka parnok Hindu nungertem masü," ta ashi.

Tetsürtem sendokba dak sendakba nung Rahul-i, "Nai (Mahatma) Gandhi noksa ngura pa den tsür ana-ase angutsü. Nenoki Mohan Bhagwat (RSS tongti) noksa nung tetsür kar noksa ngur asü?," ta asüngdang.

Paisa, "Congress-i tetsürtem nem sabang agütsür. Congress-i tetsürtema Ato kilonser inyakdaksüogo saka Modi-RSS-ibo tetsür shinga Ato kilonser meinyakdaksü," ta metetdaksü.

Mahila Congress Foundation Day sentong nungsa pai 'Sachcha Aapke Dwar' ta ser kaket ka sayatsü. Iba kaket nungji tang aliba BJP sorkari tetsürtem anema asalentong balala benoka inyakba indang shia lir.

South Korea-i submarine-launch Ballistic Missile ka tendang Afghanistan atema Pakistan aser Russia amalitep akatsü



Seoul, Rongjui/Sept. 15 (Agencies): South Korea-i submarine-launched ballistic missile (SLBM) ka Bodhbarnü takok ngua tendangteta nuclear nok-o-nü maliba linüktem rongnung iba ama system yangluteter mezüngbuba kumogo aser North Korea tashi dang temaba akumtsü nükjidong sayur.

South Korea indang missile tendangba anogo kasa nung North Korea-ia ballistic missile ana par anüdok tzükumlen tendanga UN ajanga tenokdangba agüja aliba nung aibelener. Anogo ishika tejakdang North Korea-i nuclear amshitetba cruise missile ka tendanga liasü.

Taoba ita commission asüba 3,000 ton class Dosan Ahn Chang-ho submarine nungi tzi telung nungi iba SLBM tendangba sentong nung Tir Moon Jae-in dena liasü, ta pa indang office ajanga ashi.

Nuclear weapons maliba linük kati iba ama missile yangluba linükji South Korea ya mezüngbuba akumer. United States, Russia, China, Britain, France, North Korea aser India linüktemia SLBMs ya tendangogo aser yanglua lir, aser itemji nuclear weapons abentsü

atema yangluba lir.

Küm ishika tsüngta North Korea-ia SLBMs ishika sayaogo aser itemji amshitsü atema operational submarine yanglur, ta South Korea ketdangsürtemi ashir.

"SLBM ka alibaji aisü nungi lendong timtem agütsüba nungi kumzükter, aser Korean peninsula nung yimjung aser pei sasa pei kumzüka ayuba tsütsü tongti shilem agitsü amanger," ta Moon indang office ajanga sangdong ka nung ashi.

Ketdangsürtemi SLBM indang tejangja mashi saka Yonhap news agency ajanga ashiba agi, iba dang ya Hyunmoo 4-4 nungja agüja lir, koba par indang Hyunmoo-2B ballistic missile tabu ka lir. Hyunmoo-2B ballistic missile yagi kilometer 500 shi jajatsü akoker.

Security aser itdangiter mechi küm aika defence ministry aser mitkartemi SLBM indang mejembi aruba sülen Bodhbarnü tendanga liasü.

Mitkartemi danga missile tasentem yanglua lir, aser item rongnung supersonic cruise missile ka aser ballistic missile tasen ka densema lir, ta Moon indang office ajanga ashi.

Anünglak nung amshiba

talongtsü atema amshitsü asoshi July ita solid fuel propulsion system ka mitkartemi takok ngua tendanga lir, ta parnoki ashi.

South Korea-isa military spy satellite sentong ka kübok solid-fuel rocket engines yanglutsü meranger, koba 2020s tatemlen tashinung renemtsü nükjidong lir.

South Korea-i missile tali tashi taitbatem yanglutsü meranger, koba Moon aser US Tir Joe Biden na May ita senden ka amendang pangjemba sentong ka kübok inyaker.

Missile tem ya North Korea nung longpok aser bunker tem raksatsütsü nükjidong nung yanglur, aser kasa mapang parnoki South Korea nung amenoka aliba US sepai 28,500 shi indang teyaria agir.

Tain ita defence ministry ajanga par 2022-2026 indang blueprint sayaba nung missile tashi tuluba yanglutsü sentong dena lir.

Bodhbarnü North Korea-i ballistic missiles ana tendangba ya anüngleni kilometer 60 shi tur meta kilometer 800 shi oa tsüka liasü, ta South Korea indang Joint Chiefs of Staff ajanga ashi.

Afghanistan atema Pakistan aser Russia amalitep akatsü

Moscow, Rongjui/Sept. 15 (Agencies): Afghanistan tensa atema amalitep akatsü asoshi Pakistan aser Russia lenir telephone ajanga jemba liasü, ta sorkar anaprongi sangdong balala nung ashi, koba hopta tatemlen Shanghai Cooperation Organisation (SCO) senden amentsü lia ataloker.

Russia Tir Vladimir Putin aser Pakistan Ato Kilonser Imran Khan na Mongulbarnü jemba liasü, ta sangdong ajanga ashi.

"Afghanistan tensa indang tangatetba lemsatepba mapang telok anaprongi tensa tajungba kumdaktsütsü mechi amalitep akatsü tejangraba aliba lemsatep," ta Russia nung sangdong ka ajanga ashi.

Pakistan nungeri iba jembishinü indang sangdongba nunga, "Afghanistan nung tensa balala ajurua aliba atema Pakistan aser Russia shisa agiteptsü aser amalitep alitsü kanga tongtipang süa jembi," ta shia liasü.

Sangdong nung Khan-i jembiba nung tali ranglok, kong pai Afghanistan nung yimjung tesunep atema aser iba atema imlaba indang jemba liasü.

"Afghanistan den linük balala maneni sendaktepa alitsü nüngdak, ta Ato Kilonser Imran Khan-i jembi," ta Pakistan sangdong ajanga ashi.

"Tang tensa tia mejungi akumba mapang Afghan nüburttem senzüka metoktsütsü asoshi pai jembi."

Khan-isa tekeratiba nung Afghanistan nem teyari agütsütsü ayongzük aser rongsenketzüing tsütsü timtem majurutsü atema mera balala agitsü jemba liasü.

Taoba ita Taliban-i Afghanistan amokbangba sülen nüburttem chiyongtsü agi anüngba aser makamait jenjangi aiba atema linük balala nungi sen billion \$1 jenjang teyari agütsütsü Hombarnü nangzüka liasü.

Tekeratiba nung teyari magütsüra Afghan nung million 14 dak tema yasa-tzura agi asütsü, ta World Food Programme ajanga tekum dangtsü shia liasü.

Kasa mapang US Federal Reserve, World Bank aser International Monetary Fund ajanga Afghan nung rongsen soita ayur, koba August 15 nü Taliban-i sorkar atsüngdokba sülen agiba mera ka lir.

Tamil nung tepsettsü amokmerenba sülen Sri Lanka minister ka mapa nungi anen

Colombo, Rongjui/Sept. 15 (Agencies): Sri Lanka indang Minister of State for Prisons Management Lohan Ratwatte-i anogo ishika tejakdang northern central region nung aliba Anuradhapura prison semdang dang yangji yua aliba Tamil nung tepsettsü amokmerenba sülen Bodhbarnü mana nungi anen, ta ketdangsür kati ashi.

Iba tatalokba atema Tamil political party temi pa mapa nungi anentsü aser aputsü akhangba mapang ka nung Ratwatte-i minister menden yutsü. Pa mapa nungi anenba ya Sri Lanka Tir Gotabaya Rajapaksa-i agizükogo, ta tir indang odongtar Kingsley Ratnayake-i ashi.

Ratwatte ya Anuradhapura prison-i September 12 nü ao aser tepuokdak alir nisung ana temokok agi ali nung tsükidaktsü aser tepsettsü amokmeren, ta ashi. Pai yamaji inyakba ajanga Tamil party temi pa yimya aitsü aser pa mapa nungi anentsü akhang.

"Sorkar dang tangsa state minister for prison management mapa nungi anenja aputsü aser Deobarnü Anuradhapura nung

tepuokdak alir tepsettsü a m o k m e r e n b a bushisüngdangtsü akhang," ta Tamil National Alliance (TNA) ajanga Twitter nung ashi. Tamil National People's Front lenir Galen Ponnambalam-ia iba tatalokba ya tweet ka nung shia liasü.

September 12 nikongdang state minister for Prison, Ratwatte ya Anuradhapura prisons-i oa Tamil political prisoner aja aser nisung ana pa atsüngdang apudakdaksü, ta Ponnambalam-i ashi. Minister-i Tamil nung tepuokdak alirtem tepsettsü amokmeren, ta pai ashi.

Minister ya par medemer telok ka dang nisung alensetba tesem sayutsü asoshi Colombo nung aliba tepuokdak tesem tulubai aonung menur ao aser iba sülen Anuradhapura-i ao, ta yangji aliba osangbener temi ashi. Pai pa meyong prangbong bener tepuokdak telungi ai, koba ozüing alema inyakba mapa ka lir, ta prison ketdangsürtemi ashi.

Iba tatalokba ya United Nations-ia aitsüogo.

Tepuokdak alir temeden wazüka ayutsü sorkar mapa lir, ta Sri Lanka nung aliba UN Resident Coordinator, Hanaa Singer-Hamdy-i ashi.

VP Kamala Harris tepsettsü amokmerenba atema tetsür ka aitsü

Florida, Rongjui/Sept. 15 (Agencies): United States Vice President Kamala Harris tepsettsü amokmerenba ken o nung Miami nurse kati tai nangzükogo, ta Justice Department ajanga sangdonga liasü.

Arishi küm 39 tain Niviane Petit Phelps-i aibelen trok Hokulbarnü nangzüka liasü, aser item rongnung tatong tir amokmerenba densema lir. Phelps ya November 19 nü temerenshi agütsütsü renema lir. La ya federal prison nung küm pongu tashi ayutsü.

Florida nung aliba district court ka nung ken o jembiba mapang, lai la kinungbo, shiba tepuokdak lir, pa dangi Harris tepsettsü lai amokmerenba second 30 video ka February



Kamala Harris

ita yoka liasü, ta nangzük.

Prosecutor temi ashiba agi, video nung Phelps-i amokmeren aser ola tulu agi atakatem o shia liasü. Anogo 50 tsüngta Harris tepsettsü asoshi lai sen \$53,000 agizükogo ta lai ashi, ta Justice Department ajanga

ashi.

Item video yokba sülen Phelps-i noksa ka yokba nung lai gun range ka nung prangbong ka amer liasü. Anogo ana lir Phelps-i 'concealed weapon permit' atema asüngdang, ta prosecutor temi ashi.

Iba ken o bushisüngdangba ketdangsürtem dang parnok lar kidangi maru asübo kechi ataloker lilar memetet ta ashi, ta Phelps-i okadak nangzük, ta Justice Department ajanga ashi.

Phelps-i iba ama mapa inyaktsü ya tebilemba meliasü saka la takum nung tensa tamajung ajangshiba ajanga tejashi nung jembiba lir, ta la indang okatsür Scott B. Saul-i Mongulbarnü sangdong ka nung ashi.

BASN-i Miss Nagaland Beauty Pageant ayongzüksü



Kohima, Rongjui/September 15 (TYO): 29buba Miss Nagaland 2021 tetoktepba ayongzüksü atema Beauty and Aesthetics Society of Nagaland (BASN) renemdar. COVID-19 wara pokteter aliba ajanga tetsükdaktsüba balala adokba apir iba tetoktepba ya virtually agitsü. Iba sentong ayongzüksü agitsü atema anogo ka lateta mali, ajisüaka BASN tir Mele Pucho-i tanü Ura Hotel nung osangbenertem dang ashiba agi, iba tetoktepba taküm küm tatemlen agitsü, ta metetdaktsüogo.

Paisa, iba tetoktepba nung shilem agitsü asoshi janrartem aser temsüa alirtemi October 7 nü tashi nung parnok tenüng züngoksemtettsü, ta metetdaktsü.

Kasa mapang nung iba tetoktepba atema online audition October 11 aser 12 nü agitsü ta tiri metetdaktsü.

Tetoktepba virtually agitsü sentong yanglua lir aser audition online ajanga agitsü, ajisüaka final bo terpranger medeni tetokteperitem ajak densema lia live agitsü, ta Pucho-i ashi.

Iba sentong indang recording

BASN indang official social handles tem ajanga sayutsü, ta pai ashi.

Miss Nagaland tetoktepba akoker nem senpet sen lakh ka den sempet balala agütsütsü aser iba den State Icon akümtsü aser 1buba Miss North East 2022 nung tokteptsü atema maongka angutsü, koba BASN-i Nagaland nung ayongzüksü agitsü sentong lir.

Maneni tetoktepba nung first runner nem senpet sen 70000

den sempet balala aser Miss North East nung tokteptsü atema maongka angutsü. Tasembuba jenjang nung tembangba tetokteper nem senpet sen 50,000 agütsütsü.

Pucho-i ashiba agi, iba tetoktepba nung tetsür arishi küm 18 nungi 25 tsüngdapurtem tokteptettsü. Tetokteperitem ya Nagaland lisopur asütsüla aser parnok tar süklep 5 aser inch 4 (heel mesemi) bo asütsü nüngdaker.

Office of the Yaongyimsen Tetsür Telongjem

Kohima : Nagaland

Tenüngsang Agütsür

Tamarener Tsüngrem dang tenüngsang tulu agüja, Yaongyimsen Tetsür Telongjem, Kohima-I züngsem tajung ana nem tepela aser tetushi agütsür -

- 1) Wt. T. Achila Longkumer, Superintendent (Directorate of Sericulture, Nagaland : Kohima) menden atongba atema.
 - 2) Wt. M. Asenla (Coraggio School, Kohima), District Level Teacher's Award (Kohima District) konang anguba atema.
- Nübortem ajangzüksü asoshi asen takoksang Tsüngremi nena taküm aser wadang teti moajangma.

Sd/-
Tsüktinungla
President

Sd/-
Marmongla
Gen. Secretary

Kanga Pelar

Shibai tematiba jenokdak alir, pai ajak takoksang akhümpok nung alitsü. T. Ken 91:1



ASO :
11.09.1933

ASÜ :
27.08.2021

Lanuwa nungi Tsüngrem tenzükba wadang nung ochishir tanüla nung mongin ozü temeim tsürapur obala **I. Nukshi Jamir** (Changtongya) iba akümüli arishi tempanger aoba mapang talang aser ana nungi shirnokisa sarasadem, nübo aser rongsen tenla agi ozü asükhu aser mangyim mapang yaritepogo, nenok ajak dang kangasa pelara ni ta iba sapang ajanga lemsateper.

Nenoki meimba yari ozüi kecha meyipa magütsüteter, saka tulusang Tsüngremi nenok kija aser kibong tali moajangma ta ozü tamang sarasadem.

~ Temeim Kinungsü, Chirnurtem,
Semchir aser Anükapangtem.

MULUNGNEŃ O



ASO :
1950

ASÜ :
06-09-2021

Onoki teti meima aliba ojala, **Asür L. Repamongla Longchar** (Molungkimong), la shiranga aliba mapang nungi tasünü tashi shirnokisa nübu, mapang, rongsen aser shisatsü agi ozü den yaritepogo, nenok ajak dang kanga pelar.

Tsüngremi nenok mapa tajung asoshi maneni moajangma ta ozü tamang sarasadem.

Temeim Kinungbu, Chirnurtem,
Semchirtem aser Kinunger-Anükapang.




CHIYONGTSÜ TALILA AGÜTSÜBA TAJANGZÜK

Ita trok sülen ner tanur kanga kara inyonga aoer aser iba atema tetsü mamatzü kija agi meperir, anungji tashi aser nutrients tali nüngdaker.



Ner tanur nem tanga nutritious chiyongtsütem agüjang aser kasa mapang nung maneni mama yongdakjang.

Stable chiyongtsü, legumes, shi, ango, süngolemba aser süngjanglijang densema chiyongtsü anük anüka yanglur anogoshia chidakjang.



Pele intensive care nungi aninogo



Rongjui/September 15, 2021 (Agencies): Brazil nunger nungtugu asayar tejen Pele, pa indang colon nungi tumor ka intoktsü atema surgery agiba sülen temang anepaluba mapang intensive care nungibo aninogo.

Arishi küm 80 tain Edson Arantes do Nascimento temang tajungba lir aser pa Sao Paulo kübok Albert Einstein Hospital nung pa indang takdang nung maneni temang anepalutsü, ta mozüki nungi sangdong ka ajanga Mongolbarnü metetdaksü.

Pele-i intensive care toktsüba sülen, pa minute 90

den mapang talila dena asayatsü atema renema lir, ta ashi. "Temeim osang meyrejang aika kü dangi yokba ni mazüing ta bilema teli," ta Pele-i menerema tangokba noksa ka den iba osang Instagram nung lemsatepa liasü.

"Nenok mapang minute ka agizüka ni ajungmesotsü atema osang yokba atema nenok ajak dang kanga pelar," ta pai zülutsü.


August ita tatemlen temang asadangi aoba mapang pele dak Tumor ket aliba potet. Pa surgery September 4 nü agi aser intensive care taoba hopta

toktsütsü imlaa liasü.

Tebur asayartem rongnung Pele kijai World Cups asem tashi kokteta lir. Pa 2012 küm hip replacement surgery agiba sülen senzüsenpong nung timtem adoka walker aser wheelchair amshitsüsa aküm. Kümtem tsüingda pa tezüing aser prostate nung tebilemtsü adoka anepaluogo.

Pele-i 1958, 1962 aser 1970 World Cup tem akok aser pa Brazil nunger asayartem rongnung goal timtiba idaktsüba asayar lir. Pai asaya 92 nung goal 77 idaktsür lir, koba Brazil nunger asayartem rongnung kati danga tang tashi majangteti lir.

ISL: SC East Bengal-i Tomislav Mrcela anisemogo



Kolkata, Rongjui/September 15 (Agencies): Mongolbarnü, SC East Bengal-i aruya aliba Indian Super League 2021-22 season atema taoba mapang Perth Glory nungi defender aser Australia team centre-back Tomislav Mrcela anikoba osang metetdaksüogo.

SC East Bengal head coach Manuel 'Manolo' Diaz-i team nung anikoba bendanger asayar rongnung Tomislav ya tanabuba asayar asütsü. 2018 küm Tomislav-i küm ana atema Perth Glory nung aden. Iba A-League club nung asayaba mapang, pai A-League premiership takok angu aser asayamung balala nung pai par team pur nem teyari tulu agütsüogo.

"SC East Bengal nung

adentsü maongka anguba asoshi pelar aser iba Club indang tajung aika ni angashiogo. India nung kü medemertem asayadar aser iba club indang ni angashidanga lir," ta tenangzüktep agiba sülen Tomislav-i ashi.

"Iba Club nung defence nung shilem tajung agitsü aser külem asayartem den shisa obang ka ser asayatsü tebilemba lir. Team tsüingda tesendaktep aser külem asayar tebilemba tem angadangtsü kanga dang tongtibang aser team ajangzüktsü asoshi kü dak aketba sempet tajungtiba amshia ni inyaktsü. India nung fans temi club dak teimla tulu aliba ni jangjaa lir, ajisüaka tensa ajanga iba asaya repringtsü

asoshi stadium nung parnok memelatsü ta osang angashidang nemjema bilemer. Onoki fans atema asayatsü aser parnok pelaa lidaktsütsü asoshi onoki akokba tashi ajak inyaktsü. Iba season tenzüktsü asoshi yongyaa atar," ta pai shisem.

Perth yimti nung asosang Tomislav ya Croatia nung inet aser 2001 küm Dalmatian'er telok RNK Split indang Youth Academy nung pa aden. RNK Split nung küm 8 tashi asayaba sülen, Jadran Kastel nung adentsü asoshi pai Spilt toktsü. Iba mapang, Croatia nung Jadran Kastel ya third division tekolak ka liasü.

2010 küm Tomislav-i 'NK Primorac 1929' nung aden aser NK Imotski nung pa asayar tongtibang ka aküm.

NK Imotski aser NK Mosor nung season ana asayaba mapang kanga junga asayaba atema, 2013 küm top division club NK Hrvatski Dragovoljac nung asayatsü asoshi Tomislav-i contract angu.

SC East Bengal atema Tomislav-i ajangshibatam amshia team nungitsü teimla tulu lir. Aruya aliba ISL 2021-22 season atema SC East Bengal-i taoba mapang Real Madrid Castilla boss Manuel 'Manolo' Diaz head coach asütsü shimogo.

IPL repringtsü atema fan tem nem temelaba agütsütsü

Rongjui/September 15, 2021 (Agencies): IPL 2021 season tanaben tenzükshiba atema fan tem nem temelaba agütsütsü, ta league achaayangertemi Bodhbarnü metetdaksü.

September 19 nü Dubai International Cricket Stadium nung Mumbai Indians aser Chennai Super Kings na asayaa asayamung tenzükshitsü renema lir.

"Iba asaya ya kanga jangrademtsüka asütsü, kechiyong Covid-19 wara poktetba ajanga mapang tatsüka terpranger medeni asayaba sülen tang asaya repringtsü atema temelaba agütsütsü," ta kasa sangdong ajanga metetdaksü.

Asayamung nung tanungba

asayatem atema fan temi September 16 nü nungi tenzüka official website <http://www.iplt20.com> nung ticket alitettsü. Kasa mapang nung ticket tem PlatinumList.net nungia alitettsü.

Asayatem ajak Dubai, Sharjah aser Abu Dhabi nung asayatsü, ajisüaka Covid dak sendakba inyakyim aser UAE sorkar inyakyim temulung dang yur tepringertem telatet ka dang asaya repringtsü atema temelaba agütsütsü.

Covid-19 wara agi minpronga asayamung mithinen tsüingda IPL 2021 mezüing shilem nung asaya 29 asayaogo. Tang team tem Playoffs asayatsü atema rangloker asayatsü aser kasa mapang nung asayartem T20 World Cup dak rangloker asayatsü.

T20 WC sülen Ravi Shastri-i head coach mapa toktsütsü



Rongjui/September 15, 2021 (Agencies): India tebur team head coach Ravi Shastri-i, taküm UAE nung asayatsü aliba T20 World Cup 2021 tembangba sülen head coach mapa toktsütsü renema lir.

Shastri den tenangzüktepba yanglur aliba taruba ita T20 World Cup tembangba sülen tembangtsü ajisüaka osang ajanga ashiba agi, pai tenangzüktepba tanaben meyanglushiner. Board of Control for Cricket in India (BCCI)-i, tebur team head coach mapa atema nisungtem jaoktsü.

2017 küm Champions Trophy final nung Pakistan makokba sülen Shastri ya India team head coach asütsü shim. Coach mapa agizükba sülen captain Virat Kohli den longjemer format ajak nung kanga takok ngua asayaa arudar. Shastri den mezüing küm ana atema tenangzüktepba yanglu, koba 2019 küm tembang ajisüaka pa nem ano T20 World Cup 2021 tashi inyaktsü atema maongka agütsü.

Source balala ajanga ashiba agi, Shastri-i pa indang contract

tembangba sülen mapa toktsütsü atema telemtetba agiba BCCI nem metetdaksüogo. Shastri mapang tembangba sülen Bowling coach Bharat Arun aser fielding coach R Sridhar na den tenangzüktepba yanglur aliba dena meyanglushitsütsü akok.

Ajisüaka osang ajanga ashiba agi, batting coach Vikram Rathour-i pa mapa maneni abentsü akok. BCCI-i head coach tasen ka shimtsü atema sensaksem tenzükogo aser board-i iba mapa asoshi yakta application jaoktsü. India tebur team head coach akümstsü atema nungtugu nisungtem aika tejangraba lir.

Item nisungtem rongnung India nunger asayar tejen Rahul Dravid tenüing ita ishika tetshia arudar. Taoba India captain yagi toba mapang India A aser India U19 team coach mapa inyakogo aser pa tang National Cricket Academy (NCA) tekolakba lir.

Kasa mapang nung taküm Sri Lanka den India team oa asayaba mapang Ravi Shastri melena Dravid-i khen atema head coach mapa bena liasü.

BILEMDANGANG

"Pela linüra pei akaba agi temulung süa liang."